

Barco ARC Gloria di Marina Colombiano lo yega Aruba den fin di siman

Ayera mainta durante un conferencia di prensa Consul di Colombia na Aruba, Sr. Gustavo Serrano Amaya a anuncia cu e weekend aki e Barco ARC Gloria di e Marina Colombiano, cu a bishita diferente waf rond mundo, lo yega na e waf turistico di Aruba.

Consul Serrano Amaya a splica cu e barco lo yega diadomingo awor, dia 3 di augustus pa mas o menos 8'or di mainta na e waf turistico di Aruba. Durante e estadia di e barco na Aruba, cu lo ta desde diadomingo 3 di augustus te diaranson 6 di augustus lo tin

diferente actividad abordo.

El a sigui splica cu lo tin algun tayer, charla y dia 3 di augustus na yegada di ARC Gloria lo tin un ceremonia protocolario cu lo conta cu presencia di Gobernador di Aruba SE Alfonso Boekhoudt, prome minister Mike Eman, varios minister, parlamentario y cuerpo consular di Aruba, y otro mandatarionan.

E ceremonia protocolario aki tambe lo ser presidi pa e embahadora Colombiano di Rino Hulandes, Dr. Carolina Olarte Bacares, kende lo yega Aruba diasabra.

“Nos kier extende e invitacion aki na henter pueblo di Aruba y na nos conciudadanonan pa bin bishita. Riba e dia di e ceremonia formal, entrada na e waf lo ser permiti. Manera mi a menciona, e publico lo ser permiti pa bishita dia 3, riba dialuna, y riba diaranson, te ora e barco sali merdia, cu e lo sali pa su siguiente destinacion. Esaki ta un gran oportunidad pa explora e diferente skinanan di e barco, su varios camber, y siña di Colombia su historia maritimo y cultural,” e Consul a remarca.

Consul Serrano Amaya a indica cu e Consulado di Co-



lombia tabata den contacto caba cu e varios fundacion y asociacion, no solamente di nan compatriotanan Colombiano, pero tambe di e pueblo Arubano y algun di e fundacionnan aki lo ta participante na e varios evento cu nos lo ta tumando luga riba e barco. El a splica cu lo tin presentacion di bailenan cultural, agrupacion musical, tayer y charlanan, un evento gastronomico y un evento pa empresario.

El a agrega cu ademas ta bay tin tambe oportunidad pa dialoga cu comerciantenan y algun autoridad di e isla dialuna merdia y anochi lo tin un conferencia cu lo conta cu

mas o menos 200 persona di e sector di comercio, salubridad, di gobierno y tambe personanan cu ta forma parti di diferente area y organizacion di e pueblo Arubano

Consul Serrano Amaya a enfatisa cu ta importante pa tuma nota cu lo no permiti bishita na e barco riba diars, pa motibo cu dos barco crucero hopi grandi lo ta yegando e dia ey, y autoridadnan di APA no kier e interaccion aki entre turista y hendenan cu lo kier bishita e barco pa motibonan di seguridad.

Tratamento di caso di apelacion di de Meza contra OM posponi

Ayera tardi mester a tuma luga e tratamento di e caso di apelacion cu parlamentario di fraccion AVP y candidato pa minister Mike de Meza a entama contra Ministerio Publico. Dialuna anochi informacion a sali na cla den cual ta indica cu e caso a ser posponi pa motibo di problema tecnico den corte.

Segun informacion publica den un medio di comunicacion local, abogado di de Meza, Sra. Desiree Croes, a indica cu dialuna anochi el a ricibi un notificacion informando cu e tratamento di e caso di apelacion di su cliente a keda posponi te proximo aviso pa motibo di problema tecnico den corte.

Manera ta conoci e trayecto di proceso di screening di candidato pa minister Mike de Meza a ser alarga pa moti-

bo di diferente contratiempo cu a pone un impasse den e nominacion di de Meza, cual ainda e candidato pa minister y su ekipo legal ta luchando pa resolve.

Dia 17 di juli ultimo hues a entrega su decision relaciona cu peticionnan cu de Meza a entrega na Corte den Prome Instancia. E peticion di e ex-minister, ken actualmente ta den nominacion pa bira minister den e gabinete nobo di AVP-FUTURO, ta pidi pa clarificacion tocante e tipo y e motibo di e acusacionnan cu Ministerio Publico (OM) tin contra dje. Ademas, de Meza a pidi OM pa tuma un decision si ta persigue of no prome cu 15 di augustus 2025.

Den su decision hues a splica cu OM a cumpli cu e decision di Corte di 25 di juni 2025, door di informa Mike de Meza riba e mesun dia

ey cu e ta sospechoso den un investigacion cu tin andando y a pon'e na haltura di e articulo den ley riba cual e sospecho contra dje ta basa. Tambe hues a rechasa e peticion pa OM duna contesta prome cu 15 di augustus tocante un posible persecucion. Segun hues, e peticion aki ta di considera prematuro.

E tratamento di e caso di apelacion ta enfoca riba e dos puntonan primordial cu de Meza ya a presenta den corte. Primeramente de Meza y su ekipo legal ta pidi pa OM informa exactamente kico ta e acusacion(nan) cu tin contra de Meza, y no simplemente e articulo den ley pa cual e ta sospechoso. E otro punto den e caso di apelacion ta cu de Meza y su ekipo ta pidi pa duna un fecha pa dicidi si tin suficiente prueba pa persigue.

E hues cu a rechasa e peti-



cionnan mas recien di de Meza ta mesun hues cu a tuma decision prome biaha, pues segun abogado Croes tabata logico cu e hues lo no a cambia su decision. Aworaki den e tratamento di caso di apelacion tin tres diferente hues cu lo evalua si e decision di e hues den prome instancia tabata corecto of si den caso cu nan ta evalua cu e decision no tabata corecto, pues lo por bay over pa cambia e deci-

sion aki.

Mientras tanto gobierno a nombra Sr. Gervais “Baba” Rene Herdê como minister temporal cu lo tuma cartera di Infraestructura, Energia y Telecomunicacion—originalmente reserva pa de Meza. Prome cu e nombramento di Herdê, dr. mr. Arthur Dowers tabata encarga cu e carteranan aki.